

1 PETRUS

Petrusŋe waŋe amoŋga kuyarna

Petrus nu waŋe te Kristus tuku kuasmbi ma tugu ɻakmba mbolŋe mine likinaig ta tuku kuyarna. Ait ta mbolŋe nane suŋgomba piti yeki yeki sugokanu kaŋgerkinaig tukunu nu nane piti sinamŋe bike ndaka saŋgri tiŋguwaig ɻnga waŋe te kuyarna.

¹ Kuate tuku mbal tane rawe taŋgo taŋaŋ Pontus Galesia Kapadosia Asia Bitinia ma tugu ta ɻakmba mbolŋe mine likade tane ɻakmba kaiye. Ye Petrus Yesus Kristus tuku aposel tane ndoŋ pasatam prowet. ² Tane Tukul Guwa tumba Kuate tuku mbal mayok ka Yesus Kristus tuku pasa dubika nuŋe ndare mbolŋe purfeŋnu mayok kambim tuku Kuate nu o buk tane maditingina.

Kuate nu lato-latomba tane ake sinanŋ make patika ɻgamuŋgal mukuk wamduš bul sertiŋguwa. Son.

Sine abo ɻak minmba minam tuku minde mineg

³ Suŋgo Yesus Kristus tuku Mam Kuate sine nu tuku nyu te-dunŋube. Yesus Kristus nu kumna le nu te-tina le aboŋga tiŋgina wam ta mbolŋe Mam Kuate nu sine suŋgomba mapeka kitek kile-mayokkina le kile minmba nu tuku wam magenu minde mineg. ⁴ Kuate nu samba mbolŋe sine kilam tuku madisiŋgina wam mayenu ta kultur kugatok. Menge nda. Mayenu minmba minamŋgat. ⁵ Sine Kuate nu kumunŋ ɻgeg mbal nu nuŋe saŋgrimbi sine kulatka minwa le ma ma

kugawam tuku ait mbolŋe muskil kile-tidiŋge singamŋat.

6 Tane kile ait fagnu pitи yimyam kamusde ta muskil kile-tidiŋge tiŋgam tuku wam ta idusmba gare-gareka minap. **7** Nane agaŋ afu gol kaŋgeranu suk ta kilmba siŋka gol e ŋga katesewam tuku pasokade. Taŋamba ndo taŋgine ŋgamuŋgal son ta katesewam tuku pitи yimyam pa taŋaŋ tane pasokade. Pitи mbolŋe taŋgine ŋgamuŋgal son tu-gusek mayok kinit ta Kuate am mbolŋe sungokanu ŋgisikam tuku agaŋ gol ta lite. Tane ŋgamuŋgal son ŋak ta Yesus prowa sulumbu tane tuku nyu kile-mayokkuwa le tane nyu ŋak minmba minamŋgaig.

8-9 Tane Yesus kaŋger ndanaig ta tane nu tuku kume purmba minig. Tane nu kaŋger ndade ta tane nu tuku sangri tomba tiŋgade. Tane taŋade le Kuate nu tane tuku muskil kile-tidiŋge tiŋgit le taŋgine ŋgamuŋgal son tuku alonu tade. Ta mbolŋe taŋgine gare maŋau sungo ŋayote.

10 Kuate nu ake sinaŋ sine make patika muskil kile-tidiŋgate ta tuan taŋgo kame o buk ta tuku dir pasa saka katese mayewam tuku wamdusmba minnaig. **11** Kristus tuku Guwanje tuan taŋgo kame tumniŋgina le Kuatenje madina taŋgo nu rar sungo tuwa sulumba nyu sungo pasa ŋak tamŋat ta nane isnaig. Ismba nuŋe ait ginu prowamŋat ko kilke te ndaŋndaŋmba minwa le nu prowamŋat ŋga katesewam tuku sotinaig. **12** Sotinaig ta Kuate nu tuan taŋgo kame ta saniŋgina: Taŋgine ŋgarosu turam tuku piro ndakade. O ŋgumneŋga mbal afu tuku tane pirokade ŋga saniŋgina. Mbal ta tane. Kuate nu samba mbolŋe Tukul Guwa kukulna le

ndekina le nane afu nu tuku saŋgi mbolŋe Kris-tus tuku pasa mayenu tiŋginaig. Wam kame tane isnaig ta eŋel kameŋge katesewam tuku wamdu-suŋgo ɻak minig.

Kuate nu sine mine mayebe ɻga wikina

¹³ Tane wamdu-s ndindo pilmba wamdu-s kuyar mayenu ɻak likap. Kristus nu prowa le Kuate nu tane make patikamŋat wam ta idusmba minap.

¹⁴ Tane o buk Kuate gilai minmba taŋgine nzali ɻaigonu dubikinaig ta kile kusrekap. Tane kiŋo kame magenu taŋaŋ Kuate kumnemŋje minap.

¹⁵ Kuate nu tane nuŋe kiŋo kame minam tuku wikina ta nu purfeŋnu tukunu tane nu tuku wam te-purmba taŋgine mine mbolŋe purfeŋnu minap. ¹⁶ Kuate tuku kuyar pasa teŋenmba sakate. Ye purfeŋnu minet taŋamba ndo tane yiŋe mba-l purfeŋnu minap ɻgate.

¹⁷ Tane Kuate nu siŋgine Mam ɻgade ta nu sine taŋgo ɻakmba tuku maŋau kumumbi pilesiŋgit. Ta tuku tane rironka kilke te mbolŋe minmba nu kumnemŋje minap. ¹⁸ Taŋgine mbuŋ kat taŋgine tuku maŋau alo kugatok dubika minnaig le ta ɻgamukŋje Kuate nu tane tuku muskil kile-tidiŋge tiŋgina ta gol le silwa ɻgisikam tuku agaŋ tambi nu tane piya ndatiŋgina. ¹⁹ Nu Kristus tuku ndare tambi tane tuku muskil kile-tidiŋge tiŋgina. Nane sipsip fatnu mayenu balemba Kuate atraukade taŋaŋ Kristus nu purfeŋnu minmba nuŋe ɻgarosu kumam tuku pilna. ²⁰ Kuate nu agaŋ ndende nda kile-mayokkina sulumba nu Kristus piro ta kam tuku nu madina. Kile kugawam tuku ait te mbolŋe tane turkam tuku mayok kina. ²¹ Tane nu

mbolŋe Kuate tuku saŋgri tomba tiŋgade. Kristus nu kumna le Kuate nu te-timba nyu suŋgo tuna wam ta tuku tane Kuate nu kumuŋ ŋga nu tairŋga minig.

Sine tira kame ŋgamuŋgal niŋbe

²² Tane Kuate tuku pasa tugusek dubide ta taŋgine mine magenu mbolŋe minmba miŋgembí ndo sa ndaka taŋgine ŋgarosumbi turmba taŋgine tira kame tuku kume purde. Ta tuku tane kile taŋgine ŋgarosu ɿakmbambi taŋgine taŋgine muŋgu kume purkam tuku wamduš saŋgrinu palpe. ²³ Tane kiŋo dabro kitek taŋaŋ maŋ mayok kinaig. Taŋgo tuku maŋau dubimba ina sinamŋe mayok nda kinaig. Abo ta ŋgisikam tuku. Tane Kuate tuku pasa minmba minam tuku ta tinaig sulumba kitek mayok kinaig. ²⁴ Kuate tuku kuyar pasa tejenmba sakate.

Kilke mbol mbal aŋga taŋaŋ minig.

Naŋgine mindepiye aŋga botnu taŋaŋ.

Aŋga ta tugunu lamba botnu supika ndekate.

²⁵ Suŋgo tuku pasa taŋawe nda.

Nu minmba minamŋat ŋgate. *Aisaia 40.6-8*

Nane afu pasa mayenu tane tugumŋe kuklinaig ta not.

2

¹ Tane maŋau ɿaigonu ɿakmba kusreka wam afu yabri ndakap. Taŋgine yabri maŋau yabuka sine tiŋreknu mineg ŋga sa ndakap. Afu tuku mine magenu tuku wamduš kagli fir ndakap. Afu tuku ŋgumnem pasa sa ndakap. ²⁻³ Tane buk Kuate tuku raŋgun mayenu katesenaig. Ta tuku kiŋo dabro amo nyam paraniŋgit taŋaŋ tane Kuate tuku pasa

tugusek tam tuku paratiŋguwa. Tane taŋjamba nyumba minap ma ma sugo-sugowap le muskil kile-tidiŋge tiŋgamŋat.

Ndame mayenu abo ɳak

⁴ Ndame ande taŋgo kamenŋe gisleknu ɳga te-sinaig ta Kuate nu ndame ta madimba nu ndame sunŋo ɳgina ta Kristus. Ndame ta abo ɳak. Tane nu tugum prowap. ⁵ Promba ndame abo ɳak taŋaŋ minmba Kuate tuku wande palmbim tuku taŋgine ɳgarosu patikap. Taŋjawap sulumba tane Kuate tuku pris taŋaŋ mayok ka taŋgine maŋau magenumbi Kuate atraukanu sukaŋŋaig. Tane Yesus Kristus ndon ulendikade le Kuate nu tane tuku atrau agaŋ ta nzaŋite. ⁶ Kuyar pasa tejenmba sakate.

Ye ndame sunŋo madimba tumba Sion tumbraŋ tuku ndame ɳakmba nu mbolŋe saŋri tiŋgam tuku palmbimŋgit. Ande nu ndame ta tuku saŋri tomba tiŋguwa ta nu tumail pulunuŋgat ɳgate. *Aisaia 28.16*

⁷ Tane ndame ta tuku saŋri tomba tiŋgade mbal nu tane am mbolŋe ndame sungokanu. Nane nu talade mbal Kuate tuku kuyar pasa tejenmba nane tuku sakate.

Ndame ande ndame wande pilig mbal gisleknu ɳga te-sinaig. Ndame ta kile wande ta tuku ndame ɳakmba nu mbolŋe saŋri tiŋgade ɳgate. *Mune 118.22*

⁸ Kuyar pasa ande tejenmba sakate.

Taŋgo kame ndame ta mbolŋe kupe daŋŋa mbikeka barinuŋgaig ɳga sakate. *Aisaia 8.14-15*

Kuate nu o buk sakina taŋamba ndo nu tuku pasa nda isanu sukm̄ba ɳgumnedē mbal nane baringade ta ⁹ tane taŋamba kuga. Tane Kuatenge madi-tingina. Tane nu tuku kuasmbi ndindo minig. Tane Sungo Kuate tuku pris mbal. Tane nu tuku mbal mayok ka nu tuku tur maŋau mayenu afu saniŋgam tuku nu ma make sinamŋe tane wika kilmba nuŋe bulu mayenu mbolŋe patikina. ¹⁰ Tane buk nyu kugatok mbal minnaig. Kile tane Kuate tuku mbal nyu ɳak minig. Kuate nu buk tane mape ndakina. Kile nu tane mapekate.

Wam pagu pasa yeki yeki

¹¹ Tira kame, tane samba mbolok mbal mayok ka kile teŋe rawe tanjo taŋaŋ minig. Tane ɳgarosu kikoŋ tiŋgam tuku nzali ɳakmba ɳgumneniŋgap. ɳgarosu tuku nzalinge taŋgine kanu ɳaigo siglike. ¹² Tane Kuate dubi ndade mbal ɳgamukŋe mine mayenu mbolŋe minap. Tane taŋawap ta nane tane wam ɳaigonu kanu ɳga ɳgumnen pasā tiŋguwaig sulumba tane tuku mine mayenu kaŋgeramŋaig. Kaŋgerwaig le Kuate nu nane tugum prowa le nane Kuate tuku nyu te-dunŋamŋaig.

¹³ Kilke mbol mbal naŋgine sugo yimyam patikade ta tane Kuate tuku mbal tukunu maŋau mayenu te-mayokmba nane kumnemŋe minap.

¹⁴ Kilke tuku gabat sungo ko gabat foŋfoŋ nu tuku nyu mbolŋe pirokade nane ɳakmba kumnemŋe minap. Gabat foŋfoŋ nane mbarde mbal lafu ɳayonu niŋmba wam mayede mbal nyu kile-dunŋam tuku nu patikate le nane piro ta kade.

¹⁵ Tane maŋau tiŋreknu kumba tambi nane

wamdu^s tugusek kugatok mbal tuku miŋge tukulniŋgam tuku Kuate nu nzalite. ¹⁶ Kuate nu tane muskil kile-tidiŋge tiŋgit mbal tane tukul tuku piti kugatok taŋaŋ likap. Sine tukul pasa kumnemŋje mine ndakeg ŋga wam ŋaigonu afu kam tuku idus ndawap. Tane Kuate kumnemŋje minmba nu tuku piro mbal minap. ¹⁷ Tane taŋgo ŋakmba idusniŋmba ande maim maim tuwe ndakap. Tane Kristus tuku kuasmbi tuku kume purmba Kuate kumnemŋje minmba nu tuku nyu kuraukap sulumba sisar tuku nyu idusap.

¹⁸ Piro mbal, tane taŋgine kulat mbal tuku nyu idusniŋmba nane kumnemŋje minap. Kulat mbal raŋgun magenu ta ndo kuga. Miŋge saŋgrinumbi tane kulatkade mbal mata kumnemŋje minap. ¹⁹ Tane mbar ndade le afu ake sinaj tane kattinqig le sine Kuate tuku mbal ŋga wamdu^s piti kugatok rar kurade ta tane wam mayede. ²⁰ Tane mbarde le afunge kattinqig le tane wamdu^s piti kugatok rar kurade ta alo kugatok. Tane maŋau tiŋreknu kade le kattinqig le tane ndek wamdu^s piti kugatok rar kurade ta Kuate nu nzalite.

²¹ Tane wamdu^s piti kugatok piti kurawam tuku Kuate nu tane wikina. Kristus nu sinenu ŋga rar sunjo tina sulumba piti mbolŋje sine nu tuku maŋau dubiwam tuku tumsiŋgina. ²² Nu mbar ande ke ndakina. Yabri pasa ande mata sa ndakina. ²³ Nane afunge nu tumail pannaig ta nu lafumba nane tumail pan ndaniŋgina. Nane nu ŋgaro rar sunjo tunaig ta nu lafumba riron pasa ande sa ndaniŋgina. Kuate nu taŋgo kumumbi pileniŋgit ŋga nu wam ta ŋakmba nu wai mbolŋje patikina. ²⁴ Siŋgine maŋau ŋaigonu kus-

reka mine kitek mayenu mbolŋge minbe ŋga nu sine tuku une kilm̄ba ail kazrai mbolŋge kumna. Nu tuku mbamake taŋge sine tuku muskil kile-tidiŋge singina le sine mage mineg. ²⁵ Sine sipsip taŋaŋ ndin mbarm̄ba ŋgisika mingeŋ ta kile Sipsip Kulat Tanjo tugusek tugum proweg le nu sine tuku kanu kulatkate.

3

Pino le taŋgo tuku pasa

¹ Pino kame, tane taŋgine taŋgo kat taŋgine tuku minjé kumnemŋge minap. Tane taŋamba minmba taŋgine taŋgo afu Kuate tuku pasa dubi ndakade ta tane pasa ande sa ndamba taŋgine ŋgan maŋau tambi nane Kuate dubiwam tuku didikamŋgaig. ² Tane aleŋ aleŋ ndaka Kuate kumnemŋge minmba katesek maŋau ŋak minap le taŋgine taŋgo kat taŋgine nane maŋau ta kaŋgermba Kuate dubiwam tuku iduswaig.

³ Tane gabat waŋe mara mara pareŋ latomba mindepiyimba tawi magenu tiŋmba taŋamba ŋgarosu tuku mindepiye sunjomba idus ndawap.

⁴ Tane ŋgamuŋgal tuku mindepiye wamduš bafuknu ŋgan maŋau kile-mayokkap. Maŋau ta kugawe nda. Minmba minamŋgat. Kuate am mbolŋge sunjokanu. ⁵ O buk pino kame Kuate dubimba nu minde minnaig mbal nane taŋamba ŋgamuŋgal tuku mindepiye ŋak minmba naŋgine taŋgo kat naŋgine kumnemŋge minnaig.

⁶ Tane Sara tuku maŋau kaŋgerap. Nu Abraham kumnemŋge minmba yiŋe gabat ŋga minna. Pino kame, tane wam ande tuku kuru kuru ndaka

maŋau tiŋreknu ndo kap ta tane Sara tuku kulim kame minig.

⁷ Taŋgo kame, tane mata ranjung mayenu ŋak taŋgine pino kame ndoŋ minap. Nane tane tuku saŋgri kumuŋ kuga tukunu nane kulat magekap. Kuate nu tale arŋen ake sinan̄ make patikina le tale kumu kumu abo kitek tinaik. Ta tuku tane taŋgine pino kame kulat magekap. Kuate nu tane tuku yabaŋ pasa ise ndakikat.

Sine ŋamuŋgal ulendi ŋak minbe

⁸ Ye wam pagu afu satiŋgamŋgit. Tane ŋakmba wamdus ndindo tap. Piti muŋgu turturkap. Taŋgine taŋgine kume purkap. Taŋgine nyu kilemayok ndakap. Tane muŋgu sinakap. ⁹ Nane afu tane mbolŋge wam ŋaigonu kuwaig kande tane lafumba wam ŋaigonu ke ndakap. Ko nane afu tane tumail pantiŋguwaig kande tane lafumba tu-mail pan ndaniŋgap. Kuga. Tane lafumba nyaro mayenu niŋgap. Kuate nu tane wikina ta tane nyaro mayenu kilam tuku wikina. ¹⁰ Kuate tuku kuyar pasa tejenmba sakate.

Ande nu nuŋe mine ŋakmba mbolŋge gare minam idusmba kande nu pasa ŋayonu ko yabri pasa ande sa ndakuwa.

¹¹ Nu maŋau ŋaigonu kusreka wam magenu kumba minwa.

Nu nane ŋakmba ndoŋ ŋamuŋgal mukuknu minam tuku wamdus saŋgrinu pilwa.

¹² Kuate nu taŋgo tiŋreknu kulatkate.

Nu nane tuku yabaŋ pasa isit.

Nu wam ŋaigonu kade mbal tuku ŋgueu minit.

Mune 34.12-16

Kuate tuku pasa taŋamba sakate.

Sine maŋau tiŋreknu tuku rar tam kumuŋ

¹³ Tane wam magenu kam tuku wam dus sangrinu palpe ta ande nu tane kilmba ɳaigo siglike nda. ¹⁴ Ko afunge tane maŋau magenu kap le kilmba rar tiŋguwaig kande taŋaig. Kuate nu tane mbolŋe wam magenu kamŋat. Tane taŋgo tuku wam idusmba kuru kuru ndakap. ¹⁵ Tane Kristus nu sine tuku Sunjo ɳga nu kumnemŋe minap. Ande nu ndaŋjam tane Kristus minde minig ɳga kusnatiŋguwa ndeta tane lafuwam ɳga nu idusmba pasa mukuk sawap. ¹⁶ Tane Kuate am mbolŋe mbar tuku piti kugatok minap. Tane taŋamba Kristus ndoŋ ulendika mine mayenu mbolŋe minig le afunge tane ɳgumnam pasa tiŋgig ta ɳgumnam pasa ta luka naŋgine kiko tuwaig. ¹⁷ Kuate nu nzaliwa le afunge tane maŋau tiŋreknu tuku rar tiŋguwaig kande maye. Tane mbarde ta tuku afunge rar tiŋguwaig ta ɳayo.

Kristus nu taŋgo tuku une saukam tuku kumna

¹⁸ Kristus mata mbar ndamba purfeŋnu minmba sine une ɳak mba tuku kumna. Nu sine kilmba Kuate tugum prowam tuku taŋana. Nane nu tuku ɳgarosu balenaig ta nu nuŋe kanu mbolŋe abo ɳak mayok kina. ¹⁹ Nuŋe kanu kumba ka kanu afu muliŋ kilmba ndalekanu ma mbolŋe minnaig ta pasa niŋgina. ²⁰ Muliŋ kilanu mba t'a nane Noa tuku ait mbolŋe nu waŋ kusmba minna le Kuate nu ɳgan minmba nane tairtairŋgina ta kuga. Nane nu tuku pasa ise ndakinaig. Taŋanaig le nane 8 ndo waŋ ta poŋginaig. Poŋginaig le kule tange waŋ tumba te-faitmba nane tuku muskil kile-tidiŋgina.

21 Kule pisne maŋau wam ndui ta ndo tane tuku muskil kile-tidiŋge tingit. Ngārosu tuku kutur saukate le wam ta mbolŋe kuga. Kuatē nu Yesus te-tina le tingina tane wam ta tuku saŋgri tomba tinga taŋgine mbar tuku piti saukam tuku Kuatē yabaŋmba kule pisne tade le muskil kile-tidiŋge tingit. **22** Yesus nu tingina sulumba samba mbol kumba kile nu Kuatē tuku ndinam kumamŋe nyu sungo ḥak minit le ejel kame guwa kise kise saŋgri ḥak ta ḥakmba nu kumnemŋe minig.

4

Sine Kristus tuku mbal rar tamŋig

1 Kristus nu ḥgarosu ḥak minmba nu rar sungo tina. Tane mata wamduš ndui ta ḥak minap. Ande nu une maŋau te-ibeŋam tuku ḥgarosu rar tate ta nu une maŋau kusrekate. **2** Ta tuku tane kilke te mbolŋe minmba ḥgarosu tuku nzali ḥakmba tidoŋga Kuatē tuku nzali kumnemŋe minap.

3 Tane buk kiko kugatok ḥgarosu tuku nzali ḥgail ndaka une maŋau kam tuku wamduš saŋgrinu pilnaig. Tane kule kamenu sungomba nyumba afu ndoŋ maŋgurka isukusmba maim-maimkinaig. Tane yabri mbara dubika mbar sugo fare fare ke likinaig. Kuatē dubi ndade mbal maŋau nza-liningit ta tane buk ke kumunaig.

4 Kile tane nane ndoŋ maim maim sugo kile-mayokka wam ḥaigonu ndui ta kam tuku ulendi ndakade le nane tane tuku piriri ḥayomba ḥgumnem pasa tingig.

5 Kuatē nu abo minig mbal kumanu mbal pileniŋgam tuku minit ta nane nu tugumiŋge

naŋgine mbar kile-mayokkuwaig le nu pileninggamŋat. ⁶ Kumanu mbal mata pasa mayenu isnaig. Nane une tuku lafunu kuramba kume likinaig ta naŋgine kanu Kuate taŋaŋ minmba minam tuku nane pasa mayenu isnaig.

Sine afu turniŋbe

⁷ Agaŋ ndende ɻakmba kugawam tuku ait buk patukate. Ta tuku taŋgine ɻgarosu tuku nzali ɻakmba tidoŋga wamduš kuyar mayenu ɻak lika Kuate yabaŋmba minap. ⁸ Taŋgine taŋgine lato lato muŋgu kume likinaig ta naŋgine kanu Kuate taŋgine taŋgine wande muŋgu ɻgailka ande gubra ɻak te ndakap. ¹⁰ Kuate nu ake sinaj saŋgri yimyam tiŋgina ta tane kulat mageka tambi taŋgine taŋgine muŋgu turkap.

¹¹ Ande nu pasa kukliwam kande Kuate tugumŋe tumba kukliwa. Ande nu afu turniŋgam kande nu Kuatenje saŋgri tuwit tambi nane turkuwa. Tane taŋamba kap ta wam ɻakmba mbolŋe Yesus Kristus tuku saŋgri mayok kuwa le Kuate tuku nyu afunge te-dungamŋaig. Nu nuŋe nyu kilja saŋgri ɻak minmba minwa. Son.

¹² Tira kame, piti sugo tane tagotinggaŋam tuku pa taŋaŋ tane pasokade ta tuku tane piriri ɻayo ndawap. Kristus tuku mbal piti kurawam tuku mineg ta sine kila. ¹³ Tane Kristus ndoŋ ulendika nu piti kamusna taŋamba piti afu kamusde ta tane gare-garekap. Kristus nu nyu sungo pasa ɻak mayok kuwa le tane nu ndoŋ gare sungo tamŋgaig. ¹⁴ Tane Kristus tuku kuasmbi tukunu afu tane

tumail pantinguwaig kande tane gare-garekap. Kuate tuku Guwa mayenu tane ndoŋ minit tukunu nane taŋade.

¹⁵ Tane ande bale ndawap. Agaŋ ande kuayar ndawap. Wam ɳaigonu ke ndakap. Taŋgo ande tuku wam mayenu kuer ndakap. Tane mbar taŋan kumba rar kamusap ta kiko. ¹⁶ Tane Kristus tuku nyu ɳak minmba rar tumba kande tane nyu ta kikonu yube ndaŋgap. Tane Kristus tuku nyu ɳak minig tukunu Kuate tuku nyu te-dunŋap. ¹⁷ Kile Kuate nu tugu pilmba sine nuŋe mbal pilesinŋgit ta nu tuku pasa mayenu pitaide mbal nu nane pileniŋmba ame piti niŋgamŋgat. ¹⁸ Kuyar pasa ande teŋenmba sakate.

Taŋgo magenu nane muskil kile-tidiŋgam tuku maŋauŋge liniŋgam ndafloniŋgit.

Ata. Kuate idus ndamba wam ɳaigonu kade mbal ta siŋka ɳgisikamŋgaig ɳgate. *Sindaun 11.31*

¹⁹ Kuate nu nuŋe nzali dubiwa le afunge rar tinguwaig kande taŋgine ɳgarosu Kuate wai mbolŋe pilmba maŋau tiŋreknu ndo kumba minap. Kuate nu tane wakeikina ta nu tane kulatka kusreke nda.

5

Gabat mbal tuku wam pagu pasa

¹ Tane gabat kame, ye mata gabat taŋgo minet. Kristus nu rar suŋgo tina ta yiŋe ammbi nu kanjeran. Nu nyu suŋgo kilŋa saŋgri ɳak mayok kuwa le ye nu ndoŋ kilŋa saŋgri ɳak minamŋgit. Ye tane sarsartiŋmba satiŋgamŋgit. ² Kuate tuku sipsip tane ɳgamukŋe mine likade ta tane kulat mageniŋgap. Taŋgine piro ta kanyum ndamba

gare ɳak biyap. Kuate tuku nzali ta taŋamba. Tane ndametiŋ kilam tuku idusmba piro ndaka piro tuku wamduſ saŋgrinu pilmba pirokap. ³ Sipsip kame tane kumnemŋe minig ta minge saŋgrimbi kulat ndakap. Taŋgine mine mayenu ta dubiwaig ɳga tumniŋgap. ⁴ Tane taŋamba pirokap ta sipsip kulat taŋgo tugusek nu mayok kuwa sulumba tane tuku nyu kile-mayokkuwa le nyu sugo ɳak minmba minamŋaig.

⁵ Tane mbanzo ɳakmba mage mage kumnemŋe minap. Tane Kuate tuku mbal ɳakmba nyu kile-ibeŋka muŋgu turturkap. Kuyar pasa ande tejenmba sakate.

Mbe mbolmbolkade mbal Kuate nu nane ndoŋ ɳgueu minit. Nyu te-ibeŋmba minig mbal nu ake sinaŋ nane make patikate ɳgate. *Sindau 3.34*

⁶ Ta tuku tane taŋgine nyu kile-ibeŋka Kuate tuku saŋgri kumnemŋe minap. Tane taŋamba minap le maŋau ta ɳgamukŋe Kuate nu tane tuku nyu kile-mayokka nyu sugo tiŋgamŋat.

⁷ Kuate nu tane idus tidiŋga kulatka minit tukunu taŋgine piti ɳakmba nu tuku wai mbolŋge patikap. ⁸ Tane wamduſ kuyar mayenu ɳak kurauka likap. Taŋgine ɳgueu Satan nu laion taŋaŋ nu gubanu ɳerŋerka tane tuku ande balemba nyam tuku likate. ⁹ Tane son ɳgade pasa ta biye demba saŋgri tiŋga Satan tuku minge pitaimba ye mbuilit ɳga samba minap. Taŋgine tira kame kilke yimyam mbolŋge mine likade ta nane mata piti ndui ta ndo kaŋgerkade.

¹⁰ Tane ait fagnu piti kamusap le Kuate nu ake sinaŋ tane make patikate nunŋe tane tuku

piti ait mbilmba kumumbi tiŋreknu kile-mayokka saŋgri piletin̄guwa le tane saŋgri tiŋgamŋgaig. Nuŋe kilja sungo ta minmba minamŋgat. Tane kilja ta mbolŋge minap ŋga nu Kristus mbolŋge tane wikina. ¹¹ Nu saŋgri sungo ŋak minmba minwa. Son.

¹² Siŋgine tira Silvanus nu Kristus tuku piro kumumbi biyit ŋga iduset. Nuŋge ye turyat ɬe waŋe fudiŋndo te tane tuku wamduš bul sertiŋgam tuku kuyaret. Wam mayenu tane mbolŋge minit ta Kuate nu ake sinaj make patikate wam tugusek ŋga kuyaret. Tane nu tuku wam mayenu ta kusre ndawap.

¹³ Yesus tuku kuasmbi Romŋge minig ta tane kaiye pasa tiŋgig. Kuate nu nane madiniŋgina. Yine kinjo Markus nu mata tane tuku kaiye pasa tiŋgit. ¹⁴Tane taŋgine taŋgine tira kame ndoŋ kume pur maŋau alonu kile-mayokap. Tane Kristus tuku mbał ŋakm̄ba ŋgamuŋgal mukuk ŋak minap.

Son.

**KUATE TUKU PASA
Portions of the Old Testament and The New Testament
in the Siroi Language of Papua New Guinea
Sampela hap Buk Baibel long tokples Siroi long
Niugini**

copyright © 1975, 1999 Wycliffe Bible Translators, Inc.

Language: Siroi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-07

PDF generated using Haiola and XeLaTeX on 11 Nov 2022 from source files dated 22 Nov 2019

9d2e8659-afb4-5cca-93d8-23ebf89e1709